

7. — *L'Empereur.*

De ta maison disposeras
 Comme de ton bien transitoire,
 Car là où mort reposeras
 Seront les chariotz de ta gloire.

8. — *Le Roi.*

Ainsi qu'aujourd'huy il est roy,
 Demain sera en tombe close :
 Car roy aulcun de son arroy
 N'a sceu emporter aultre chose.

9. — *Le Cardinal.*

Mal pour vous qui justifiez
 L'inhumain et plein de malice
 Et par dons le sanctifiez,
 Ostant au juste sa justice.

10. — *L'Impératrice.*

Qui marchez en pompe superbe,
 La Mort ung jour vous pliera ;
 Comme soubz voz piedz ployez l'herbe,
 Ainsi vous humiliera.

11. — *La Reine.*

Levez vous, dames opulentes ;
 Ouyez la voix des trespassez :
 Après maintz ans et jours passez,
 Serez troublées et doulentes.

12. — *L'Evêque.*

Le pasteur aussi frapperay,
 Mitres et crosses renversées ;
 Et lors quand je l'attrapperay,
 Seront ses brebis dispersées.